

## ■ COLUMNA

# Chantun Rumantschia

## – betg discutabels

DA GIUSEP NAY\*

**N**ovas ideas, magari er utopicas, san esser nizaivlas per il svilup necessari sin tut ils camps, essend che vita es dapi Darwin evoluziun e mo evoluziun es vaira vita. Quai vala er per il rumantsch e l'organiziun da Rumantschas e Rumantschs per promover e mantegnair lur lingua materna. L'idea d'in stadi da Rumantschs en fuorma d'in 27avel chantun Rumantschia, lantschada d'in professer da dretg en in referat a caschun d'ina dieta a Cuir (mira La Quotidiana dals 22-07-2014) n'è deplorablmain dentant betg discutabla e maina be – ditg in pau salop ma cler – sin ina via pulaina.

**C**h'in giurist svilupscha in tala proposta fa star sin il chau. Quella cunterdi pli u main a tut las trais cundiziuns da noss dretg statal, che ston esser ademplitas per pudair discurrer d'in stadi. In stadi presuppona in pievel, pussanza statala ed oz – il temps dals libers sco p. ex. quels da Lags sparpagliads en l'Intschess d'auters signurs è passà - cunzunt er in territori.

**I**l pievel dal nov stadi dulessen quellas personas en Svizra furmar che pledan rumantsch ed èn burgais svizzers. Ma tge è cun ils Rumantschs egl'exteriur e quels betg burgais en Svizra che pledan rumantsch? Èn quels betg Rumantschs? E tge vala sch'ìls uffants da quels Rumantschs na pledan betg pli rumantsch? Cura è la cundiziun «pledan rumantsch» ademplita e co vegn quai controllà? E tge vala sch'ina persona na pleda betg pli rumantsch?



U sch'ella pleda rumantsch, vul dentant betg far part dal chantun Rumantschia? Dumondas sin dumondas che mettan grondamain en dubi sch'ins sa plidar d'in pievel sco cundiziun per furmar in stadi.

**C**he la pussanza statala vegniss a star sin chommas fitg falombras conceda l'autur da la proposta cun admetter ch'ina essenziala cumpetenza d'in stadi sco la polizia stuess vegnir delegada als auters chantuns. Vulcan quels dentant quai? E tge sch'els na vulan betg? E tge sch'ì dat conflicts – e quels fissen bain inevitabels – tranter personas appartenentas al „stadi“ sin basa be persunala e talas dal stadi territorial?

**S**in la cundiziun d'in territori desista la proposta. D'in stadi en il senn dal dretg modern sa perquai claramain betg vegnir discurrì. Quai stat en cuntradicziun diametrala cun il concept da nossa confederaziun che consista or dals chantuns sco stadis suverans sin il territori svizzer e mintgin cun ses territori. Il territori e la

pussanza sur il pievel che viva sin quel sco en la democrazia er la pussanza da quel sur il territori èn la basa dalla suveranità dals chantuns entaifer la limita che la costituziun federala conceda a quels. Vulair implantar en quest sistem costituziunal in stadi er suveran, construì suletta-main sin ina basa persunala, è pli spert ditg che fatg. Co quellas duas suveranitàs dal tuttafatg differentas sil plaun fiscal, penal, linguistic e da scola, sco quai che l'autur vesa ella er per il chantun persunal dals Rumantschs, duain funcziunar ina dasper l'autra è e resta il misteri da l'autur. Ch'ì dat tschertas excepziuns dal principi territorial vul anc ditg betg dir ch'ina suveranità totala persunala saja pussaivla dasper quella er totala territoriala. Il cuntrari sa tschentan er qua dumondas sin dumondas sch'ins vuless insumma guardar cunter il dretg vertent sco in stadi er ina cuminanza d'in pievel senza territori.

**L**a pli gronda dumonda è dentant quella: Tge avantatgs purtass la construcziun statala proponida a la Rumantschia sch'ella fiss realisabla? La cumparaziun cun la Scozia, la Catalognia ed il Pajais Basc, per mussar in gudogn d'identità cun ina dimensiun statalpolitica er per Rumantschas e Rumantschs, va en scadin cas totalmain pe zop, siand ch'ì sa tracta tar quels projects sa chapescha da stgaffir novs stadis e quai, il cuntrari da la proposta, cun agen territori.

\* Giuseppe Nay, è stà president dal Tribunal federal a Losanna.